

“At panintunan yuku, at akit yuku, ngening panintunan yuku king kekong mabilug a puso.” —Jeremias 29:13

**Tune
Pamipasakop
King Dios**

MAKANANU TAYANG ABALU ING DIOS?

Antimo y Abraham “kaluguran ning Dios” king uli na ning kayang pamipasakop at kapamintuan king Dios, ikayu man malyari yeng abalu ing Dios at asubukan ing Kayang pakalulu, kapayapan at kanuanan. Kabaluan king Dios mangabaldugan *tune pamipasakop* at ing pamagtiwala kaya ya ing pekamaulagang karanasan king bie. Tune makapagmulala ing pami-pasiag ning Dios king Keang Sarili karetang anggag magdulap Kea king mabilug dang puso.

Nung *paimburis* kong lumakad king sarili yung dalan at *tune kong pasakop* king Dios ing Keang Espiritu mie ya kilub yu. *Ala* nang makapiwale kekayu king Keang lugud kabang *magtiwala* kayo karing Keang pangako at tukian yong ating kapamintuan. Ya ing maguing Dios yu, at ikayu ding Keang maulagang pibandian. Abalu yu king seli nakayu king maragul a alaga at buri na king mika atin kong pamiugne Kea—*ngeni angga king kapilan pa man*.

Aduan yu king Dios ing kekong beluan kabang pagaralan yula ding Amanu ning Dios. Kesian no ning Dios ding Keang anak a sinulat kareting Amanu at pepaintulut nang manatili la king sablang panahon libutad na ning dakal a ligalig nang Satanas ban deti ela mipalimbag.

Ding piakitan karing Amanu ning Dios atiu kaniting papilitu, meangu la king Banal a Kasulatan, karing Kautusan (Torah) karing Dalit (Zabur) ding Sulat ding propeta at ding Evangelio (Injil).

Deuteronomio 6:4b, 5

I JEHOVA a kekatáng Dios metung yáng Guinu. At luguran me i JEHOVA a kekang Dios king mabilug mung puso, at king mabilug mung kaladua, at king mabilug mung sikanan.

Isaias 45:18

Uling makanian ing sasabian nang JEHOVA a linalang karing banua, ing Dios a minie anyu king labuad at guewa ne iti, a mitatag kaniti at e ne lelangan a metung a ilang, a guinawa kaniti bang panuknanganan: aku i JEHOVA; at ala nang aliwa pa.

1 Ari 8:60

Bárang abalu ding anggung ba-

layan king labuad king i JEHOVA, Dios ya; ala nang aliwa pa.

Isaias 43:10, 11

Ikong kanakung saksi, sasabian nang JEHOVA, . . . bayung abalu at maniwala kayu kanaku, at atalastas yu king aku pin ya: alang Dios a initsuran a minuna kanaku, ni e mika atin kaibat ku. Aku, aku pin, aku i JEHOVA; at subali kanaku alang talapagligtas.

Isaias 45:22

Lumawe kayu kanaku, at pailigtas kayu, ikong anggung wakas ning labuad; uling aku ing Dios, at ala nang aliwa pa.

2 ING DIOS MALAM YA AT MAPAMAKALULU

Dalit 103:8, 11

I JEHOVA malúnusan ya at malam, banayad king pamimua, at labislabis king kapakaluluan. Uling nung makananung ding banua matas la king babo ning labuad, makanian karagul ing keang kapakaluluan karetang tatakut kea.

Dalit 103:17a, 18b

Dapot ing kapakaluluan nang JEHOVA manibat king alang angga angga king alang angga karetang tatakut kea, . . . At karetang makaganaka karing keang tuntunan bárong daptan.

Miqueas 7:18

Ninu ing metung a Dios a anti ika, a patawad king dewakan, . . .

uling tutula ya king kapakaluluan.

Atiu karing pakalulu nang JEHOVA a e tamu malipul, uling ing keang kapibabatan e maguiguisan. —Tagulele 3:22

Uling king bistat palungkut ya, makanianman mika atin yang lunus agpang king keraklan na ning keang kapakaluluan.

—Tagulele 3:32

King mapamakalulu pakilala kang mapamakalulu. —Dalit 18:25a

Oh munie kong pasalamat kang JEHOVA: uling mayap ya; uling ing keang kapakaluluan manatili kapilan man. —1 Cronica 16:34

Jeremias 31:3

I JEHOVA pepakit ya king minuna kanaku, ngana, Wa, aku liguran dakang alang anggung lugud: inya pin linapit ku keka a ating kayubuan a lub.

Jeremias 29:11

Uling balu ko ding kaisipan a ukulan ku kekayu, nganang JEHOVA, kaisipan king kapayapan, at e king dewakan, bang dinan dakong kapanayan king tauli yung kawakasan.

Malaquias 1:2a

Aku liguran dakayu, sasabian nang JEHOVA.

Dalit 103:13

Nung makananung ing metung a ibpa lulunusan no ding keang anak, makanian nong lulunusan JEHOVA ding tatakut kea.

1 Juan 4:16a, 19

At abalu tamu at peniwalan ing lugud na ning Dios a atiu kekatamu. Itamu lulugud tamu, uling yang minunang linugud kekatamu.

Sofonias 3:17

I JEHOVANG kekang Dios atiu libutad mu, a metung a makapayan a magligtas; tumula ya keka king kasayan; painawa ya king keang lugud; tumula ya keka a ating pamandalit.

4 **ING PEKAMAULAGANG DILING BAGUE KETI KING YATU YA ING ABALU ME ING DIOS**

Dapot ing balayan a makakilala king karelang Dios maguing masikan ya, at dápat yang kabayanijan. —Daniel 11:32b

Jeremias 9:24

Nung e ing maliligaya maligaya ya sana kanini, king ya atin yang pamanalastas, at kakilala naku, king aku i JEHOVA a magsane king kapakaluluan, king justicia, at king katuliran, king labuad: uling karing bague a deti matutula ku, nganang JEHOVA.

Dalit 119:2

Nuan la detang misisimpan karing keang pamipatutu, a manintun kea king mabilug a puso.

Deuteronomio 30:19b, 20a

Binili ku king arapan yu ing bie at ing kamatayan; ing kanuanan at ing sumpa: inya pilinan ye ing bie, . . . A lugaran ye i JEHOVA a kekong Dios, a pamintuan yu ing keang siwala, at manatili ko kea; uling ya ing kekong bie.

Dalit 42:1

Nung makananung magnasa ya ing usa king danum ding sapa, makanian yang magnasa ing kakung kaladua keka, Oh Dios.

Exodo 33:14

At sinabi na, Ing pangaatiu ku ume kayantabe mu, at dinan dakang kapainawan.

MIE MAGDILIDILI A ALANG PAKIALAM ING DIOS MAPANGANIB

5

2 Cronica 15:2b

I JEHOVA mamantabe ya keka-
yu, kabang ikayu ati ko kea; at
nung panintunan ye, ya akit ye;
dapot nung paimburisan ye, paim-
burisan nakayu.

Jeremias 17:9

Ing pusu mapamiraya ya a mai-
guit karing sablang bague, at ma-
rawak yang bina: ninu ing maka-
balu kaniti?

Kasebian 16:25

Ating metung a dalan a balamu
matulid ya king metung a tau,
dapot ing wakas na nita dalan la
king kamatayan.

Ing Guinu balu nong iligtas
king tuksu ding banal, at ibili
ding e banal bang magkamit
parusa king kayaldawan na ning
pamanukum. —2 Pedro 2:9

Dapot nung e yu pakiram-
daman ing siwala nang JEHOVA,
nung e lumaban kayu salang king
utus nang JEHOVA, kanita ma-
guing salang ya kekayu ing
gamat nang JEHOVA.

—1 Samuel 12:15a

Nung ing ninumang tau e mana-
tili kanaku, miugse ya anting
metung a sanga, at langi ya; at ti-
punan dala, at yugse ro king api,
at maduluk la. —Juan 15:6

6 BAN ABALU ME ING DIOS, KAILANGAN MENG PANINTUNAN

At panintunan yuku, at akit yuku, ngening panintunan yuku king kekong mabilug a pusu.

—Jeremias 29:13

At salugsugan mung anting pi-bandian a makasalikut: Kanita atalastas mu ing takut kang JEHOVA, at atuklasan mu ing beluan king Dios.

—Kasebian 2:4b, 5

Maniawad kayu, at mirinan kayu; manintun kayu, at manakit kayu; tigtig kayu, at mibuklatan kayu.

—Mateo 7:7

At nung alang kasalpantayanan e malyaring makapalugud;

uling karampatan king ing lalapit king Dios maniwala ya king ya pin, at king ya ing mamablas karing manintun kea. —Hebreos 11:6

Kaluguran kula ding lulugud kanaku, at detang manintun masipit kanaku akit daku.

—Kasebian 8:17

I JEHOVA mayap ya karetang manaya kea, king kaladua a manintun kea.

—Tagulele 3:25

Bang panintunan de ing Dios, nung sakali man, panamdaman deng miamasamas at akit de; bistat e man marayu kaninuman kekatamu.

—Dapat 17:27

Uling i JEHOVA a kekong Dios malam ya at mapamakalulu, at e ne igulut ing keang lupa kekayu, nung mibalik ko kea.

—2 Cronica 30:9b

Uling ika, Guinu, mayap ka, at makasadiang mamatawad, at labislabis king kapakaluluan karing anggung mamaus keka.

—Dalit 86:5

Lumapit kayu king Dios, at ya lapitan nakayu. . . . —Santiago 4:8a

I JEHOVA malapit ya karetang anggung mamaus kea, karetang anggung mamaus kea king katu-tuan.

—Dalit 145:18

Ume ko keni ngeni, at mipagma-

tulid tamung makapamisan, nganang JEHOVA: king bistat ding kekong kasalanan anti mo ing grana, maguing maputi la a anti mo ing nieve. —Isaias 1:18a

Mateo 11:28, 29

Lumapit ko kanaku ikong anggung mapagal na at kababayatan, at aku dinan dakong kapainawan. Pusanan ye ing paud ku, at magaral ko kanaku; uling mamu ya at mapagpakumbaba ing pusu ku: at manakit kong kapainawan king kaladua yu.

Juan 6:37b

Ing lalapit kanaku, king makananu mang bague e ke isakuil.

Exodo 15:11a

Ninu ing anti ika, . . . Oh JEHOVA? . . . a kaliligaya king kabanalan.

1 Samuel 2:2a

Alang banal a anti mo kang JEHOVA; Uling ala na subali keka.

Job 34:10b

Marayu na sa king Dios, a dapat yang marawak, at king Mayupaya king sabla, bang magkamit yang dewakan.

Isaias 6:3b

Banal, banal, banal, ya i JEHOVA ra ding ejercitos; ing mabilug a labuad mitmu ya king keang ligaya.

Isaias 57:15a

Uling makanian ing sabi na ning Matas at Mataluktuk a manuknangan king alang angga, a ing keang laguiu Banal: manuknangan ku king matas at banal a karinan.

Dalit 145:17

I JEHOVA matulid ya karing anggang dalan na, at malam ya karing anggang dapat na.

Marcos 10:18b

Ninuman alang mayap nung e mu metung, a yamu ing Dios.

Apocalipsis 15:4a

Ninung e tumakut, Oh Guinu, at e paligaya king keang laguiu? uling ikang sarili ing banal.

DAPAT LANG MIE BANAL DING TAU NING DIOS 9

Santiago 2:19, 20

Ika paniwalan mu king ing Dios metung ya mu; mayap ing darapatan mu: ding demonios man mani-wala la, at gagalgal. Dapot buri mung abalu, Oh taung alang kabaldugan, a king ing kasalpan-tayanan a alang dapat baug ya?

1 Juan 3:10

Kaniti ding anak ning Dios mipakilala la at ding anak ning diablo: itang e darapat katuliran e king Dios, ni itang e lulugud king keang kapatad mu naman.

Kasebian 15:9

Ing dalan na ning marawak metung a makasumami kang JE-

HOVA; Dapot kaluguran ne itang tutuki king katuliran.

Tukian yu ing kapayapan dikil karing sablang tau, ampon ing kabanalan a nung ala kaniti ninuman e ne akit ing Guinu.

—Hebros 12:14

Dapot katulad na ning pangabanal na nitang kekayu minaus, magpakabanal kayu naman king keganaganang ayus ning kabia-yan.

—1 Pedro 1:15

Panintunan yu ing mayap, at aliwa ing marawak, bákong mie; at inya i JEHOVA, ing Dios da ding ejercitos, mantabe ya kekayu, anti mo ing kekong sasabian.

—Amos 5:14

Nanu ing aduan nang JEHOVA keka, nung e dápat kang matulid, at lúgud king ganaka, at lumakad a ating kababan a kayabe na ning kekang Dios. —Miqueas 6:8b

Magpakabanal kayu; uling aku i JEHOVA a kekong Dios banal ku. —Levitico 19:2b

Luguran me ing Guinung Dios mu mabilug king pusu mu, at mabilug king kaladua mu, at king mabilug mung sikanan, at king mabilug mung kaisipan; at ing kalupa mung tau anti ing kekang sarili. —Lucas 10:27b

Ika balu mo ding kautusan, E ka makamate, E ka darapat paliwas, E ka manako, E ka patutu

king e katutuan, E ka mamirait, Igalang me i ibpa mu at i indu mu. —Marcos 10:19

At e ko mamapus agpang king yatung iti, nung e bagkus maliwa kong aske king pangabayu ning kekong kaisipan. —Roma 12:2a

Iting libru ning kautusan e kakawani king asbuk mu, nung e pigunamgunaman me king aldo at bengi, bámung apamintuan daptan ing anggang makaagpang king makasulat kaniti: uling kanita apala mu ing kekang lakad, at kanita magkamit kang mayap a kasaplalan. —Josue 1:8

Salpantaya ko king Dios.

—Marcos 11:22b

Kasebian 6:16-19

Ating anam a bague a pikakasaman nang JEHOVA; Wa, pitu la ding makasumami kea: Palalung mata, malaram a dila, at gamat a mibububu king alang kasalanan a daya; Metung a pusu a mikakatsa karing marawak a nasa, ding bitis a masalusu king pamamulaing painturu king kamulangan, Ing metung a saksing malaram a mangisnawang kalaraman, at ing tatanam king pamitua ra ding mikakapatad.

Isaias 61:8a

Uling aku, i JEHOVA, luluguran ku ing justicia, pikakasaman ku ing pamanako.

Apocalipsis 21:8

Dapot karing matakutin, at karing e maniwala, at karing makasumami, at karing mapamakamate tau, at karing makipangalugud at mapaganitu, at sasambang idolos, at karing anggung malaram, ing maguing dake ra king dayatdayatanmalat a mitaung api at asupri; a ya ing kamatayan a kadua.

Inya pin maningat ko king kekong espiritu, at e sa pabustan ing ninuman a magtaksil ya salang king asawa na ning keang kayanakan. Uling pikakasaman ku ing pamikawani, sasabian, nang JEHOVA. —Malaquias 2:15b, 16a

TAUNG MEBALDUG KARING KABURIAN NING DIOS

Juan 5:42

Dapot aku balu rakayu, king ala kekayu ing lugud ning Dios.

Santiago 2:10

Uling ninu ya man ing mi-mingat king mabilug a kautusan, at miragsa ya king metung mung tuldik, ya meguing pikasalahan na no ngan.

Santiago 4:17

Kanitang maki balu pin king pamaniapat mayap, at e na darap-tan, king kea iti kasalahan.

Roma 3:10

Agpang king makasulat, alang banal, ala, metung man.

Roma 3:23

Uling ding sabla mikasala la, at e ra akamtan ing ligaya na ning Dios.

1 Juan 3:10b

Itang e darapat katuliran e king Dios, ni itang e lulugud king keang kapatad mu naman.

Isaias 53:6a

Ita ngan anti tamung tupa a melili; mine tamu balang metung king keang sariling dalan.

1 Samuel 6:20b

Ninu ing malyaring mitalakad king arapan nang JEHOVA, king banal a Dios a iti?

Uling patutu ku karela king atin lang binang katapatan king Dios, dapot e agpang king beluan. Uling anti ning ala lang balu king katuliran na ning Dios, at pagpilitan dang italakad ing sariling karela, ila e ra papasakup ing sarili ra king katuliran na ning Dios. —Roma 10:2, 3

Isaias 64:6a

Uling ikaming sabla meguing anti kami ing metung a marinat, at ing anggung katuliran mi meguing piblasan a mirinatan.

Ezequiel 33:13

Ngening sabian ku king matulid, king alang pangakablang mie ya; nung manalig ya king

keang katuliran, at magkamit yang dewakan, nanuman karing matulid nang dapat alang ganakan; nung e king keang dewakan a kimtan na, karin ya mate.

Roma 8:8; 3:20a

At ding atiu king laman e la makapatula king Dios. Uling king uli ra ding dapat ning kautusan alang laman a matanggap banal king keang panimanman.

E king ikami mu rin makaguiu na kami king kekeng sarili, bang ibilang mi ing isanu mang bague a ibat karing sarili mi; nung e ing kekaming kaguiuan ibat king Dios. —2 Corinto 3:5

ING KASALANAN KAKAWANI NAKATAMU KING DIOS

Roma 5:12

Inya pin, nung makananu a king uli ning metung mung tau ing kasalanan linub king yatu, at king uli ning kasalanan, ing kamatayan; at kaniti ing kamatayan dinalan karing anggung tau, uling ding sabla mikasala la.

Ezequiel 18:20a

Ing kaladua a mikakasala, iti mate ya.

Isaias 59:2

Dapot ing kekong dewakan ya ing mikawani kekayu at king kekong Dios, at ing kekong kasalanan ya ing tinakap king

keang lupa kekayu, bang keta e ya makiramdam.

2 Cronica 24:20b

Makanian ing sasabian na ning Dios, Baket sasalangsang kayu karing utus nang JEHOVA, inya pin e ko mipala? uling pepaimburisan ye i JEHOVA, ya man pepaimburisan nakayu.

1 Samuel 15:23a

Uling ing kapanlabanan anti mo ing kasalanan king pamangulam, at ing kesiasan buntut anti mo ing pamaniambang idolo Uling ika sikuil mu ing amanu nang JEHOVA, ya man sikuil naka.

ING ATUL NA NING DIOS ATIU KING KASALANAN

15

Dalit 7:11

Ing Dios metung yang matulid a ukum, wa, metung yang Dios a maki mua king balang aldo.

Colosas 3:6

A dikil karing bague a deti daratang ing mua ning Dios karing anak ning pamanalangsang.

Roma 1:29-32

Mikatmuan la king anggang e katuliran, karawakan, kaingguitan, kapamiukulan; kitmuan king diria, pamakamate, pamakipate, kapamirayatnan, marawak a ugali, mapanutsut, mapanlibak, ating sama king Dios, mapalmura, mayabang, mapamikud-

tang dewakan, e mapamintu karing mangatua, alang kaisipan, mapanlabag tipan, alang tala-gang pamakamal, alang kapa-kaluluan: A nung ninung balu ra ing tuntunan ning Dios, king ding darapat karing anti kareting bague karampatan la king kama-tayan, e mu king daraptan da iti, nung e pa naman pamayapan da karetang darapat kaniti.

Uling ing mua ning Dios mipakit manibat banua, salang karing anggang alang kabanalan ampon alang katuliran ding tau, a mamambangan king katutuan uli ning dewakan. —Roma 1:18

Hebreos 9:27b; 10:31

Mitalaga karing tau king mate lámung misan, at kaibat na niti tuki na ing pamanukum. Metung a makatakut a bague ing manabu karing gamat ning Dios a mabie.

Ecclesiastes 12:14

Uling dalan na ning Dios ing balang dapat king kayatulan, kagum ning balang makasalikut a bague, maguing mayap, o maguing marawak man.

Apocalipsis 20:12, 15

At ikit ko ding mengamate, ding mangaragul at ding mangalati, makatalakad la king arapan na ning luklukan; at mengabuklat la ding libru: mebuklat ya ing

metung a aliwang libru, a ya ing libru ning bie: at ding mete meatul la karing bague a makasulat karing libru, agpang king dapat da. At ing e meakit makasulat king libru ning bie misaldak ya king dayatdayatanmalat ning api.

Mateo 12:36

At sasabian ku pin kayu a ing balang amanung alang kabaldugan a igkas da ding tau, ibie rang sulit king aldo ning pamanukum.

Mateo 13:49, 50a

Makanian mu naman king kawakan na ning panaun: lual la ding angeles, at ikawani ro ding marawak karing mayap, at yugse ro king horno ning api.

Kasebian 15:3

Ding mata nang JEHOVA atilu king balang karinan, a magbante king marawak at king mayap.

Dalit 139:1-4

Oh JEHOVA, siniasat muku, at akilala muku, Ika balu mu ing pamaglukluk ku at ing kakung pamalakad; atatalastas mu ing kaisipan ku king marayu. Siasatan me ing kakung daklat at ing kakung pamagkera, at kakilala mo ding sabla kung dalan. Uling alang metung a amanu king kakung dila, dapot, oini, Oh JEHOVA, balu mu iti ngan.

1 Samuel 16:7b

Uling e lalawe i JEHOVA a anti

mo ing pamanlawe na ning tau; uling ing tau lalawe ya king aske lual, dapot i JEHOVA lalawe ya king puso.

Jeremias 16:17

Uling ding kanakung mata atilu karing sabla rang lakad; e la makapampan king kakung lupa, ni e makasalikut ing karelang dewakan karing kakung mata.

Hebreos 4:13

At alang metung mu mang melalang a e mipakit king keang panimanman: nung e bagkus ding keganaganang bague lubas la ampon makabuklat la karing mata na nitang kekatamung pagsulitan.

Ezequiel 18:23

Atin ku waring nanumang tula king kamatayan na ning marawak? sasabian na ning Guinung JEHOVA; at e wari mayap a gumulut ya king keang lakad, at mie ya?

Lucas 13:3

Ali, aku sasabian ku kekayu, bagkus nung e ko sumisi, iko ngan mate kayu namang makanian.

Kasebian 28:13

Itang tatakap king sarili nang pamanalangsang e ya mipala; dapot ing mipapasiag at paimburis kareti magkamit yang pakalulu.

Joel 2:12

Makanianman aguiang ngeni, sasabian nang JEHOVA, mibalik ko kanaku king mabilug yung pusu, at ating pamagayunu, at ating pamangiak, at ating pamagpaldas.

Hosea 14:2a

Magdala kong amanu, at mibalik ko kang JEHOVA: sabian yu kea, Ilako mu ing anggung dewakan, at tanggapan mu ing mayap.

Job 33:27, 28

Lalawan nala ding tau at ing ninuman sabian na mikasala ku. ... Ya inatbus ne ing kanakung kaladua ibat king pamanlub king kulkul, at ing kanakung bie akit na ing sala.

Isaias 55:6, 7

Panintunan ye i JEHOVA samantalang malyari yeng akit; maus kayu kea samantalang makalapit ya: Paimburisan na sa ning marawak ing keang lakad, at ing e matulid ing keang pamiisip; at pabustan yang mibalik kang JEHOVA, at mika pakalulu ya kea; at king kekatang Dios, uling labislabis yang mamatawad.

Dalit 34:18

I JEHOVA malapit ya karetang malalaso pusu, at liligtas nala ding ating espiritung magsalbat.

Kikilalanan ku ing kasalanan ku keka, at ing kanakung dewakan e ku selikut: Sinabi ku, Sale-

sean ku ing pamanalangsang ku kang JEHOVA; at pepatawad mu ing dewakan na ning kakung kasalanan. —Dalit 32:5

1 Juan 1:9

Nung ipasiag tamu ing kekatang kasalanan, ya tapat ya at banal bang patawaran nakatamu king kekatang kasalanan, at linisan nakatamu king sablang dewakan.

Dapat 3:19a

Sumisi ko pin, at mibalik kong pasibayu, bang makalis ing kekong kasalanan.

Ing pamanisi mangabaldugan lakuan ing kasalanan at ikukumpisal king Dios.

PAMAGSACRIFICIO KAILANGAN KING PAMIKASUNDO KING DIOS

Ing kasalanan kakawani
nakata mu king Dios

Pablasang ing bie na ning laman atiu king daya; at iti binie ke kekayu king babo ning altar bang dápat pamisut dikil karing kaladua yu: uling ya ing daya a darapat pamisut alangalang king bie.

—Levitico 17:11

At dikil king kautusan, maiguit kung asabi king ding keganaganang bague luminis la king daya; at nung alang mibubung daya alang pangayatbus. —Heb. 9:22

Ing kekong cordero ya itang alang pintas, metung yang lalaki a pabanua na:... At ing daya maguing metung a tanda kekayu

karing bale a nung nu ko karin: at panga akit ku ing daya, lumabas ku a manginlag kekayu, at alang batbat a dumpa kekayu bang manyintang. —Exodo 12:5a, 13a

At sinabi nang Abraham, anak ku, Ing Dios isadia ne ing biserung tupa dikil king ain a durulukan... At tinas nong Abraham ding mata na, at linawe ya, at, oini, ing metung a tupang lalaki king keang gugulatan makasilu la king laput ding keang sagu: at mine ya i Abraham at kinua ne ing tupang lalaki, at dinaun neng ain a durulukan a kalili na ning keang anak. —Genesis 22:8a, 13

Y JESUS YA ING CORDERO A TELAGA NING DIOS

21

Juan 1:29

Kabukasan ikit ne i Jesús lalapit ya kea, at sinabi na, Oini, ing Cordero ning Dios, a makalako king kasalanan ning yatu!

Hebreos 9:12, 28a

E mu naman king pamamilatan na ning daya ding kambing ampon ding vacang biceru nung e king keang sariling daya, linub ya misan angga na king mangga king banal a karinan, inyang akamtan na ing alang anggang pangayatbus. Makanian mu naman i Cristo, a inain na king misan mu, bang dalan na ing kasalanan ding dakal.

1 Pedro 1:18a, 19

Baluan yu king meatbus kayu, e karing bague a masisira, king pilak o guntu, ... Nung e king maulagang daya, anti mo ing metung a cordero a alang pangapintas at alang dungis, a ya ing daya nang Cristo.

Hebreos 9:14

Lalu na pa ing daya nang Cristo a iti king pamamilatan na ning alang anggang Espiritu inain na ing keang sarili alang musing king Dios, linisan na ing kekong pilubluban karing dapat a mete bang sumuyu king Dios a mabie?

PANGAYATBUS KAPAMILATAN NING PAMITALAGA NING DIOS KING KEANG ANAK

Roma 3:24, 25a

A mipamayapan timawa king uli ning keang kalam, king pamamilatan na ning pangayatbus a atiu kang Cristo Jesus: A yang binili ning Dios anting ain king kablasan, king pamamilatan ning kasalpantayanan, king daya na.

Roma 5:8, 9

Dapot ing Dios itatalaga na ing keang lugud dikil kekatamu, uling kanitang itamu makasalanan ta pa, i Cristo mete ya king uli tamu. Lalu na pin, metanggap tamung banal king keang daya, miligtas tamu king mua ning Dios king uli na.

Efeso 2:8

Uling king kalam makakabus kayu king pamamilatan na ning kasalpantayanan; at e ibat keayu mu rin, iti kalam na ning Dios.

Dapat 10:43

Iti mu rin ya ing patutuan da ding anggung manula, a king laguiu na detang anggung kea maniwala, kamtan da ing kapa-tawaran king kasalanan da.

Dapat 4:12

At kaninu pa man alang kaligtasan; uling ala metung mang laguiu lalam ning banua, a miabie karing tau, a makakabus kekatamu.

ING PAMIPASIAG KING KEBAITAN NANG JESUS 23

Lucas 1:26-37

... Ing ángel Gabriel tiburan ne ning Dios king metung a ciudad ning Galilea, a mayayaus Nazaret, King metung a dalagang alang bakas a ketanguanan na ning metung a lalaki a ing laguiu na José, king bale nang David; at ing laguiu na ning dalagang malinis, María... At ing ángel sinabi na kea, María, e ka tatakut: uling menakit kang kalam king Dios. At oini kumagli ka, at manganak kang metung a lalaki, at pamalaguiuan meng Jesús. Iti maguing maragul ya, at mayaus yang Anak na ning Kakataskatasan: ... at ing kayarian na e mi-

rinan wakas. At i María sinabi na king ángel, Makananung mapalyari iti, uli ning aku e ku kikalalang lalaki? At mekibat ya ing ángel, ngana kea, Ing Espiritu Santo ume ya keka, at ing upaya ning Kakataskatasan lilungan naka: uli niti ing banal a pungul a mibait, mayaus yang Anak ning Dios... Uling alang amanung ibat king Dios a alang upaya.

Ding bukud taong mitalaga king yatu a e dinalan king bie pamiasawa ila ri Adam a y Cristo. Dela nang Adam ing kasalanan king yatu, dapot y Jesus dela na ing tagumpe laban king kasalanan.

Filipos 2:6

A iti, king aske a panga Dios, e na binilang ing pangapante na king Dios metung a bague dapat nang galmangan.

Juan 10:30, 36

Aku at i Ibpa ku metung kami mu. Sasabian yu kanitang pepagbanalan na at tinubud na king yatu ning Ibpa, Ika maniumpa ka; uli na ning sinabi ku, Aku ing Anak ning Dios?

Y Jesucristo ya ing alang anggang Verbo. Kapamilatan ning *himala* guewa na ning Dios ing Anak na milayun ya kilub nang atian Maria. King bie pisikal, ya ing Anak na ning Tao, dapot king bie espiri-

tual, ya ing Anak na ning Dios. Ding Kasulatan gagamitan de ing amanung "Anak" ban ipakit na ing relacion a atiu pilatan ning Dios at ing Verbo—Y Jesucristo.

Hebreos 10:5

King uli na niti ngening datang ne king yatu, sabian na, . . . dapot ing katawan sidia me kanaku.

Roma 1:4

A metunggue nang Anak ning Dios maki kayupayan tungkul king espíritu ning kabanalan, king keang pangasubling mebie ibat karing mete.

Juan 20:28

Mekibat ya i Tomás, at sinabi na kea, Guinu ku, at Dios ko.

1 Timoteo 3:16a

At king alang nanumang pami-salangsang, maragul ya ing misterio ning kabanalan; itang mipabalu king laman.

Colosas 2:9

Uling kea manuknangan ing mabilug nang panga Dios king pamikatawan tau.

Isaias 9:6

Uling kekatamu mibait ya ing metung a anak, ing metung a anak a lalaki miabie ya kekatamu; at ing pamanibala mibili king keang pago: at ing keang laguiu mayaus yang Makapagmulala, Talausuk, Makapayan a Dios,

Alang anggag Ibpa, Principe ning Kapayapan.

Juan 8:58

Sinabi na pin karelang Jesús, ... sasabian ku kekayu, Bayu ya pin mibait i Abraham, atiu naku.

1 Timoteo 2:5, 6a

Uling ating metung a Dios, at metung a talapamilatan mu naman king Dios at karing tau, ya kabud tau ya, a ya i Cristo Jesús, a binie na ing keang sarili a metung a panatbus karing sabla.

Colosas 1:14, 15a

A kea atiu ing kekatang pangayatbus, ing kapatawaran ning kekatang kasalanan: A iti yang larawan na ning Dios a e mayayakit.

26 ING BANAL A KASULATAN, YA ING AMANU NING DIOS

2 Pedro 1:21

Uling kapilan man alang ula a mipadala king kaburian ning tau: nung e ding tau miniabi lang ibat king Dios king kimut ning Espiritu Santo.

Anti mo ing sinabi na king asbuk da ding keang banal a manula, a menibat la pa king minuma. —Lucas 1:70

Ing Espiritu nang JEHOVA miniabi ya king uli ku, at ing keang amanu mitumpak king kanakung dila. —2 Samuel 23:2

Ing balang kasulatan a kesian na ning Dios mapakinabang mu naman king pamanuru, king

pamangamanu, king pamanlarin, king pamanuru king atiu king katuliran. —2 Timoteo 3:16

Uling ding nanu mang bague a misulat king minuna pa, misulat la dikil king kekatang pangaturu, bang king pamamilatan na ning kapibabatan ampon ning tula karing kasulatan itamu mirinan táng kapanayan. —Roma 15:4

Mateo 22:29b

Mababalatung kayu, uling e yo balu ding Kasulatan, ampon ing kayupayan na ning Dios.

Uling peparagul mu ing amanu mu king babo ning mabilug mung laguui. —Dalit 138:2b

Apocalipsis 19:13

At misusulud yang metung a imalan a pisikanan daya; at ing laguiu na mayayaus, **ING VERBO NING DIOS.**

Juan 1:1, 14a

King kamumulan ya ing Verbo, at ing Verbo kagum ne ning Dios, at ing Verbo Dios ya. At ing Verbo mikatawan yang tau, at mekiabe ya kekatamu.

Y Jesus bilalag ne ing Dios

Juan 1:18

Ala pang taung menakit king Dios kapilan man; ing bukud Anak a bugtung, a atiu king kandungan ning Ibpa, ya pepakilalane.

Ing Dios magsalita ya kapamilatan nang Jesus

Hebreos 1:1, 2

Ing Dios, anti ning sinabi na king minunang panaun karing ibpa king pamamilatan ding manula king miayaliwang dake, at king miayaliwang paralan, Sinabi na king katataulian da deting aldo, kekami king pamamilatan ning Anak na, nung ninu ing tilduan nang talapagmana karing anggag bague, a king pamamilatan na naman guewa no ding panaun.

Juan 8:38a

Aku sasabian ko ding bague ikit ku kang Ibpa ku.

ING PAMILIMPI RA DING MISULAT AT MABIE AMANU

*Ing Biblia ya ing pamangan ning
kaladua*

Mateo 4:4b

E mu king tinape karin ya mie ing tau, nune king balang amanung manibatan king asbuk ning Dios.

*Ing Biblia ya ing sulu da ding
kekatang daklat*

Dalit 119:105, 130

Ing kekang amanu sulu ra ding bitis ku, at sala na ning daklat ku. Ing pangabuklat da ding amanu mu babie sala; babie pama-nalastas king alang balu.

Y Jesus ya ing Tinape ibat Banua
Juan 6:51, 48

Aku ing tinape a mabie a tini-pang ibat banua: nung ninuman mangan ya king tinape a iti, mie yang alang kapupusan: wa at ing tinape a ibie ku ya ing laman ku, a kabiayan na ning yatu. Aku ing tinape na ning bie.

Y Jesus ya ing Sulu ning Yatu

Kea atiu ing bie; at ing bie ya ing sulu ding tau. I Jesús pekisabian nong pasibayu, ngana, Aku ing sulu ning yatu: ing tuki kana-ku e lumakad king dalumdum, nung e mike ya kea ing sulu ning bie. —Juan 1:4, 8:12

***Ing Biblia magdala yang
mabungang bie***

Dapot ing keang tula atiu king kautusan nang JEHOVA; at king kautusan na mibulebule ya king aldo at bengi. At maguing anti yang metung a dutung a mitanam king siping na ning agus na ning danum, a mamunga ya king keang kapanaan. —Dalit 1:2, 3a

***Y Jesus babie yang
mabungang bie***

Manatili ko kanaku, at aku kekayu. Aku ing wake, ikayu ding sanga: Itang manatili kanaku, at aku kea, iti magdala yang dakal a bunga: uling nung makakalilua ko kanaku nanuman ala kong arapat. —Juan 15:4a, 5

**ING BANAL A KASULATAN MAGSALITA YA 29
TUNGKOL KANG JESUCRISTO**

Saliksikan yo ding kasulatan uling isipan yu king atiu karela ing bie yung alang angga; at ilang patutu kanaku; . . . Uling nung paniwalan ye i Moisés, paniwalan yuku naman; uling sinulat ya

tungkul kanaku. —Juan 5:39, 46

At manibat kang Moises, at karing anggang manula, ding baque makatungkul kea selese no karing mabilug a kasulatan. —Lucas 24:27

DING AMANU NING DIOS ELA LILIPAS KAPILAN MAN

Dalit 119:89, 160

Kapilan man, Oh JEHOVA, ing amanu mu manuknangan king banua. Ing kabilugan na ning kekang amanu katutuan; at ing balang metung karing matulid mung tuntunan manatili ya kapilan man.

Isaias 40:8

Ing dikut malalangi, ing sampaga kukupas ya; dapot ing amanu na ning kekatang Dios talakad king kapilan pa man.

Mateo 5:18b

Angga king ing banua at gabun lumipas, kapatak man at kagulis alang mawala king kautusan

angga king mituparan ing kegaganang bague.

Juan 10:35b

Amanu na ning Dios . . . e malyaring masira.

*Ene malyaring ayalilan ning
tao ing Biblia*

Kasebian 30:6

E ka daragdag karing keang amanu, magkang ibawal naka, at mayakit kang metung a malaram.

Apocalipsis 22:19a

At nung ninumang tau lakuan no ding amanu ning libro niting ula, ing Dios man ilako na ing keang dake king libro na ning bie.

ING KAMATAYAN NANG JESUS KAGANAPAN 31 YA KING PLANO NA NING DIOS

Juan 10:17, 18a

Uli na niti ing Ibpa kaluguran naku, uling daraun ke ing bie ku, bang kuanan keng pasibayu. Alang ninumang makalako kaniti kanaku, nung e kusa kung idaraun. Atin kung kayupayan munie, at atin kung kayupayan a kuanan kung pasibayu.

Isipan mu galang king e ku makaaus kang Ibpa ku, at ya, ngeni mu rin, padalan na kung miguit king labing aduang tapuk a ángeles? Makananu lang matupad ding kasulatan, a deti sasabian da king kailangan ing malyari ing makanian? —Mateo 26:53, 54

Dapat 3:18

Dapot ding bague a pepaunan nang belita ning Dios king asbuk da ding anggang manula, king lumasa ya ing keang Cristo, metupad a makanian.

Dapat 2:23

Itang, miabie king mearing kayatulan at talaga ning Dios, ikayu king uli ring gamat da ding tampalasan pinaku ye at pete.

Isaias 53:10a

Makanianman birian nang JEHOVA a panasakitan ne; binili ne king kapanamdaman: nung daptan mung ing keang kaladua metung yang ain king kasalanan.

32 ING PAMIPATUTU RA DING SAKSI TUNGKOL KING KEMATAYAN NANG JESUS

At pinaku rong kayabe na ding aduang tulisan; ing metung king wanan na, at ing metung king kaili na. —Marcos 15:27

Mateo 27:45, 50-51, 54

Ngeni manibat king oras a kanim medalumdum king meto sikluban angga king oras a kasiam. . . . At i Jesús miuman yang kinulait masikan, at binie ne ing keang espiritu. . . . at guinalgal ing gabun; at ding batu mengabangal la. Ngeni ing centurion pin, ampon ding abe nang babante kang Jesús, panakit da king ayun at king bague a mengapalyari, mitakutan lang bina, ngarang

sinabi, Tutu pin king iti ya ing Anak ning Dios.

Juan 19:32-37

Dinatang la pin ding káwal at bilbal de puad ing mumuna, ampon itang metung a abe nang makapaku: Dapot inyang linapit la kang Jesús, at ikit da king metene, e re bilbal a puad: Makanian man ing metung karing káwal inungsul ne king katalindikingan king metung a tandus, at kanita mu rin linual ing daya at danum. . . . Uling ding bague a deti milyari la, báng matupad ing kasulatan, Ing butul na e mabalbal. At lalawen . . . de itang tindus da.

ING PAMAGTAGUMPE NANG JESUS KING KAMATAYAN

33

Dapat 2:24, 32

A pepasublian neng mebie ning Dios, inyang aligtas na ne karing pikamandagan na ning kamatayan: uling e malyaring apiguil ne niti. Iting Jesús binangun ne ning Dios, kaniti ike ngan saksi kami.

Hebreos 2:14, 15

Manibat kanita ding anak makarake la king laman ampon king daya, ya man anti mu rin dinake ya king anti kaniti; bang king pamamilatan na ning kamatayan dalan ne king pangawala itang maki upaya king kamatayan, a ya iti, ing diablo; at iligtas nala detang a king pamamilatan ning

takut king kamatayan kabang bie ra makasakup la king pangalipan.

Apocalipsis 1:18

At ing Mabibie; at aku mete ku, at oini, aku mabie ku angga king mangga, at atilu kaku ding susi ning kamatayan at ning Hades.

2 Timoteo 1:10

Dapot mipakilala ngeni king pamamilatan na ning pangalto na ning kekatáng Mángabus a i Cristo Jesús a ya leko na ing kamatayan, at inatad na king sala ing bie at ing alang kamatayan king pamamilatan na ning evangelio.

NANU ING SUKAT TAMUNG DAPTAN KANG JESUS?

Oini, ati ku makatalakad king pasbul at titigtig ku: nung ninuman pakiramdaman na ing siwala ku at ibuklat ne ing pasbul, lungub ku kea, at makiapun kung kasulu na, at ya kanaku.

—Apocalipsis 3:20

Tanggapan ye ing Espiritu Santo. . . . maniwad kayu, at tanggap kayu, bang miganap ing tula yu.

—Juan 20:22b; 16:24b

Uling nung ipasiag me king kekang asbuk i Jesús anting Guinu, at paniwalan mu king kekang pusu king ing Dios pepasublian neng mebie ibat karing

mete, ika miligtas ka.—Roma 10:9

Ing lugud kang ibpa na, o indu na miguit pa kanaku, e dapat kanaku. . . . Kanita sinabi nang Jesús karing keang alagad, Nung ing ninuman bisáng tuki gugulutan ku, isakuil na ing keang sarili, at dalan ne ing cruz na, at tuki ya kanaku. Uling ninu mang miligtas king bie na, mawala ya kea: at ing ninu mang kawalan king bie na king uli ku mu akit ne.

—Mateo 10:37a; 16:24, 25

At nung kang Cristo kayu, nung makanian bini nakung Abraham, talapagmana agpang king pangaku. —Galacia 3:29

KAPAMILATAN NANG JESUS ATIN TAMUNG BAYUNG BIE

35

1 Juan 5:11, 12

At iti ya ing pamipatutu, king ing Dios binie na kekatamu ing bie alang angga, at ing bie a iti atiu king keang Anak. Itang nung ninu ing atiu kea ing Anak atiu kea ing bie; itang nung ninu ing alayu kea ing Anak alayu kea ing bie.

Galacia 2:20a

Mipaku kung abe nang Cristo; at aliwa na aku ing mabibie, nung e i Cristo yang mabibie kanaku: at ing bie a ita a ngeni mabibie ku king laman mabibie ku king kasalpantayanan, ing kasalpantayanan a atiu king Anak ning Dios.

Roma 8:2

Uling ing kautusan na ning Espiritu ning bie kang Cristo Jesús linigtas naku king kautusan na ning kasalanan ampon ning kamatayan.

Inya nung ninuman atiu kang Cristo, metung yang bayung melalang: ding bague a matua linipas na la, oreni, meguing bayu la.
—2 Corinto 5:17

Penganak nakong pepasibayu, e king bining masisira, nung e king e masisira, king pamamilatan na ning amanu ning Dios, a iti mabie at manatili.
—1 Pedro 1:23

ING DIOS IBPA YA KARING KEANG TALASALPANTAYA

Metung yang ibpa ra ding ulilang tata, at metung yang ukum ding mebalung babai, ing Dios king keang banal a tuknangan. —Dalit 68:5

Isaias 64:8; 63:16b

Dapot ngeni, Oh JEHOVA, ika ing kekeng Ibpa; ikami ing burak, at ika ing kekeng magtatálu; at ike ngan dapat nake ning kekang gamat. Ika, Oh JEHOVA, ing kekeng Ibpa; Talapanatbus mi manibat king alang angka ya ing kekang laguiu.

Mateo 7:11; 6:9

Nung ikayu pin mangarawak

kayu, biasa kong magkalub karing anak yu, lalu ne kasi i Ibpa yung atiu banua munie mayap a bague karing maniwad kea? . . . Manalangin ko pin anti kanini: Ibpa mi, a atiu banua, Samban da sa ing laguiu mu.

2 Corinto 6:17b, 18

At aku tanggapan dakayu, at akung kekong maguing Ibpa, at ikayu ding anak kung lalaki at anak a babai, ngana ning Guinung Mayupaya king Sabla.

Roma 8:14

Uling ding angang tatairan na ning Espiritu ning Dios, deti anak no ning Dios.

KAPAMILATAN NANG JESUS ABALU TAYA ING 37 DIOS ANTIMONG IBPA

Juan 14:6, 7, 23b

I Jesús sinabi na kea, Aku ing dalan, at ing katutuan, at ing bie; ninuman alang miras king Ibpa, nung e king uli ku. Nung abalu yuku, abalu yuya naman i Ibpa ku: manibat ngeni abalu ye, at ikit ye. Nung ing metung a tau lulugud ya kanaku tuparan na ing amanu ku: at i Ibpa ku luguran naya, at ikami ume ke kea, at gawan miya ing tuknangan ming kayabe na.

Galacia 4:4, 5; 3:26

... Pepabal ne ning Dios ing keang Anak, ... bang tanggapan tamu ing pangaampun anting

penganak. ... Uling iko ngan anak na naku ning Dios, king pamamilatan ning kasalpantayanan, kang Cristo Jesús.

Dapot detang kea tinanggap pigkaluban nong mipalaguiwan anak ning Dios; detang maniwala king laguiu na. —Juan 1:12

At ninuman ing mikasala, atin tamung metung a Pintakasi king Ibpa, a ya pin, i Jesucristo ing banal. —1 Juan 2:1b

Uling king pamamilatan na itamu atin tang panlub king uli na ning metung mu ring Espiritu paike king Ibpa. —Efeso 2:18

Y JESUS MAGDALA YANG LUGUD, TULA AMPONG KAPAYAPAN

Ing Dios lugud ya: at ing manuknangan king lugud, manuknangan ya king Dios, at ing Dios manuknangan ya kea.

—1 Juan 4:16b

At maguing maganaka kayu king metung at metung, malambut a pusu, mipapamatawad ing metung at metung, nung makanaanung ing Dios kang Cristo pepatawaran nakayu. —Efeso 4:32

Kaniti abalu ra ding sablang tau king alagad dakayu, nung atin kong lugud king metung at metung. —Juan 13:35

Dapot ing bunga ning Espiritu

ya ing lugud, tula, kapayapan . . .

—Galacia 5:22a

Ipakit me kanaku ing daklat na ning bie: Atiu king arapan mu ing mitmung tula. —Dapit 16:11a

Anti ning metanggap ping banal king kasalpantayanan, atin tamung kapayapan king Dios king pamamalatan na ning Guinu táng Jesucristo. —Roma 5:1

Ing kapayapan lalakuan ku kekayu; ing kapayapan ku babie ku kekayu: e anti ing pamamie na ning yatu, ing pamamie ku kekayu. E ye palingasngasan ing pusu yu, ni e ye paburen mitatakutan.

—Juan 14:27

PASUBLIAN NONG MIE JESUS DING KAYANG TALASALPANTAYA

39

Dapot nung ing Espiritu na nintang pepasubling mebie kang Jesús ibat karing mete makasaut ya kilub yu, ing pepasubling mebie kang Cristo Jesús ibat karing mete dinan nala namang bie ding kekong katawan a maki kamatayan king pamamilatan na ning keang Espiritu a makasaut kilub yu.
—Roma 8:11

Uling iti ya pin ing kaburian nang Ibpa ku, a ing balang metung a lalawe king Anak at maniwala kea, mika bie yang alang angga; at aku pasublian kong mie king tauling aldo.
—Juan 6:40

1 Corinto 15:21-23

Uling king pamamilatan na ning tau dinatang ing kamatayan, king pamamilatan na naman ning tau dinatang ing pangasubli rang mie ding mete. Uling nung makanang kang Adam ding sabla mangamate la, makanian mu naman kang Cristo ding sabla mie la. Dapot ing balang metung king sarili nang ayus: i Cristo ing munang bunga; at kaibat ding kang Cristo, king panaun na ning keang pamaniatang.

Juan 14:19b

Uling aku mabie ku, ikayu man mie kayu.

ETA DAPAT PABUREN ING ALOK NANG KALIGTASAN CRISTO

Ing metung a taung payalang ulaga king kautusan nang Moisés, mate yang alang kapakaluluan nanuman king amanu ra ding adua o atlung saksi: Nu kaya anti kasakit ing parusa, a ukulan yu, a maguing karampatan, kanitang dinalpak lalam ding keang bitis king Anak ning Dios, at guewa nang anti mong e banal a bague ing daya ning pangaku a mekapagbanal kea, at depatan nang alang panalala king Espiritu ning kalam? —Hebreos 10:28, 29

Ing misasakuil kanaku, at e na tatanggapan ing amanu ku, ating metung a matul kea. —Juan 12:48a

Juan 8:24

Inya sinabi ku kekayu, king mate kayu king kasalanan yu: uling subaling maniwala kayu king aku pin, mate ko king kekong kasalanan.

Lucas 12:4, 5

At sasabian ku kekayu, kakaluguran ku, E ko tatakut karing papate king katawan, at kaibat na nita ala nong nanu nang arapat. Dapot iwaran dakayu nung kani-nu ko sukat tumakut: Tumakut ko kanitang kaibat nang leko ing bie, atin yang kayupayan mugse king infierno; wa, sasabian ku kekayu, pitakutan ye.

Dapat 17:31

Anti na ning ya mitalaga yang aldo a ipanukum na king meto yatu king matulid, king pamamilatan na ning metung a lalaking telaga na; a iti papatutuan na karing sablang tau, ketang ya ibangun neng ibat karing mete.

Juan 5:22, 23a

Uling ing Ibpa e mamatul kaninumang tau, nung e binie na king Anak ing mabilug a pamantul; bang ding sabla purian de ing Anak nung makananu reng parangalan ing Ibpa.

2 Corinto 5:10

Uling kailangan a ike ngan malyari keng mipakilala king ara-

pan na ning luklukan ning piukuman nang Cristo; bang ing balang metung tanggapan no ding bague . . . agpang king depatan na, aguiang mayap man o marawak.

Roma 2:16

King aldo a atulan na ning Dios ing dapat dang makasalikut ding tau . . . , king uli nang Jesucristo.

2 Tesalonica 1:7b, 8

King pamipatilip na ning Guinung Jesús manibat banua kayantabe no ding ángeles ablasan nala ding e maki balu king Dios, ampon detang e mamintu king evangelio ning Guinung Jesús.

42 E DING SABLANG MAGBALATKAYONG TUTUKI KANG CRISTO BANDI NONG JESUS

Bubulalag dang balu re ing Dios; dapat king dapat da payalian de. —Tito 1:16a

Dapot nung ninu mang tau a ala yu kea ing Espiritu nang Cristo, iti ala ya king kea. —Roma 8:9b

At lulukluk la king arapan mu a anti mong kanakung balayan, at pakiramdaman do ding keang amanu, dapat e ro daraptan; uling papakit lang dakal a lugud... dapat ing karelang pusu tutuki ya king karelang pakinabang. —Ezequiel 33:31b

Ing balayan a iti pupurian naku

karing labi na: dapat ing pusu ra marayu ya kanaku. —Mateo 15:8

E ing balang metung a sasabi kanaku, Guinu, Guinu, lungub ya king kayarian banua; nung e itang darapat king kaburian nang Ibpa kung atiu banua. Dakal la ding sumabi kanaku king aldo a ita: Guinu, Guinu, e ke wari menula king laguiu mu, ampon king laguiu mu pepalual keng demonios, at king laguiu mu dinapat keng dakal a mayupayang dapat? At kanita itutul ku karela, Kapilan man e ra ko kilala: kawani ko kanaku, mapaniapat marawak. —Mateo 7:21-23

MAMINTU LA KANG JESUS DING TUNE NANG TALATUKI

43

1 Juan 2:3

At kaniti baluan tamu king aki-kilala táya, nung tutuparan tála ding keang utus.

Ezequiel 36:27

At ibili ke ing kakung Espiritu king lub yu, at palakaran dakayu karing kanakung tuntunan, at ingatan yula ding kanakung kautusan, at daptan yula.

Hebreos 5:9

At inyang sakdal ne, meguing penibatan ne ning alang anggang pangakabus da ding sablang kea mamintu.

Roma 6:18

At anti ning miligtas na ko king

kasalanan, milyari kong talasuyu na ning katuliran.

Uling talapaniapat nakatamu, melalang kang Cristo Jesús dikil karing mayap a dapat, a deti ing Dios sidia na nang minuna, bang lumakad ta kareti. —Efeso 2:10

Uli ping nung mabibie kayu dikil king laman, kailangan mate kayu; dapot nung king uli ning Espiritu papaten yula ding dapat ning katawan, mie kayu.

—Roma 8:13

Paburen yang kalilua king dewakan ing balang tutungue king laguiu ning Guinu.

—2 Timoteo 2:19b

44 KALABAN NO NING YATU DING TALATUKI NANG JESUS

Juan 15:18, 19

Nung ing yatu pikakasaman nakayu, balu yu king akung pikasaman na bayu ikayu. Nung king yatu kayu, ing yatu luguran no ding kea: dapot anti ning e ko king yatu, nung e aku pinili rakong ibat king yatu, inya kasaman nako ning yatu.

Wa, datang ing oras a ing ninu-mang makamate kekayu, isipan na king mamain yang kasuyuan king Dios. At daptan do deting bague uling e re balu ing Ibpa, ni aku man. —Juan 16:2b, 3

1 Juan 3:1

Lawan yu nung makananung

lugud ing binie na kekatamu ning Ibpa, bang mayaus tang anak ning Dios; at deti itamu pin. King uli na niti ing yatu e nakata akikilala, pablasang e ya kinilala kea.

Dapat 14:22b

At king uli na ning dakal a kasakitan kailangan ing lungub tamu king kayarian ning Dios.

2 Timoteo 3:12

Wa, at ding anggang mie king kabanalan kang Cristo Jesús mibata la king kaligaligan.

Juan 16:33b

King yatu mirinan kong kagut-gutan: dapot tumula kayu; aku sinaul ke ing yatu.

PANGAKO NANG JESUS KARING MALILIGALIG 45

Isaias 41:10

E ka tatakut, uling mamantabe ku keka; e ka masasdan, uling aku ing keang Dios; pasiknangan daka; wa, saupan daka; wa, itas daka king wanan nang gamat ning kakung katuliran.

Ngening paimburisan naku ning kakung ibpa at ning kakung indu. —Dalit 27:10

Nanupata king mayap a tetagan asabi tamu, ing Guinu yang kanakung talasasaup; e ku tumakut: Nanung arapat na kanaku ning tau? —Hebreos 13:6

Nung melibak kayu king laguiu nang Cristo, nuan kayu; uling ing Espiritu ning ligaya at ing

Espiritu ning Dios manuknangan ya kekayu. —1 Pedro 4:14

Dalit 91:11; 23:4a

Uling munie yang bilin karing keang ángeles makatungkul keka, bárankang ingatan karing sabla mung lakad. Wa, aguiamang lalakad ku king libis ning lilung na ning kamatayan, ala kung takútan a dewakan; uling ika mamantabe ka kanaku.

Malyaring arapat ku ing kegaganang bague kanitang kaku pasikan. At ing kakung Dios katmuan na ing anggung kekong kailangan agpang king keang pibandian king ligaya kang Cristo Jesús. —Filipos 4:13, 19

TAGUMPE LABAN KING KASALANAN AMPON SATANAS

1 Corinto 10:13

E ko mirasnan nanumang tuksu a e na malyaring apibata ning ni-numang tau: dapot tapat ya ing Dios, a iti e na paintulut king tuk-suan dakayu a maiguit ketang aguiu yung pibatan; dapot ka-langkap ning tuksu, gawan na ne man ing dalan na ning pamana-kas, báyung malyaring apibata.

Hebreos 4:16

Tara lumapit ta ping maki teta-gan king luklukan na ning kalam, bang tanggap tamung kapaka-lulan, at manakit tang kalam a sumaup kekatamu king panaun ning pamagkailangan.

1 Juan 1:7

Dapot nung lalakad tamu king sala, anti mo ya atiu king sala, atin tang pamakiagum king metung at metung, at ing daya nang Jesús a keang Anak lilinisan nakatamu king sabla táng kasa-lanan.

Santiago 4:7

King uli na niti pasakup ko pin king Dios; dapot salangsang kayu king diablo, at ya takasan na-kayu.

Dalit 119:11

Ing keang amanu sinimpan ku king kakung pusu, bang e ku mikasala salang keka.

ING TUNE PANALANGIN PAMAKIUGNE YA KING DIOS

47

Dalit 27:8

Inyang sinabi mu, Panintunan yu ing kanakung lupa; ing kanakung pusu sinabi na keka, ing kekang lupa, JEHOVA, panintunan ke.

Dalit 62:8

Manalig ko kea king sablang panaun, ikong balayan; itugtug ye ing kekong pusu king arapan na: Ing Dios metung yang santungan dikil kekatamu.

Jeremias 17:14

Uluan muku, Oh JEHOVA, at maulu ku; iligtas muku, at miligtas ku: uling ika ing kapurian ku.

1 Tesalonica 5:17, 18

Manalangin kong alang patugut; king balang bague munie kong kapasalamatan: uling iti yang kaburian na ning Dios kang Cristo Jesús tungkul kekayu.

Nung manatili ko kanaku, at ing amanu ku manatili kekayu, aduan yu itang buri yu, at marapat kekayu. —Juan 15:7

Dalit 66:18; 25:11

Nung linawe ku mu ing dewakan king kakung pusu, ing Guinu e ya makiramdam: King uli na ning kekang laguiu, Oh JEHOVA, patawaran mu ing kakung dewakan, uling maragul.

Y JESUS DATANG YANG PASIBAYU — MAGSADIA KAYO

1 Tesalonica 4:16, 17

Uling ing Guinu kabud yang kuldas ibat banua, maki metung a gulisak, king siwala ning arc-ángel, at king pakakak ning Dios: at ding mete kang Cristo talakad lang muna; kanita itáng mabie, a makatagan, mayakua tamu a kayabe ra karing biga, bang salubung king Guinu king angin; at kanita akayabe nakatamu ning Guinu king kapilan pa man.

2 Corinto 7:1

Anti ning atiu pin kekatamu ing pangakung anti kaniti, kaluguran magpakalinis ta sa king anggung karinatan ning laman at king

espíritu, gawan tamung sakdal ing kabanalan king takut king Dios.

1 Juan 2:28

At ngeni, mangalati kung anak, manatili ko kea; bang, nung mipasiag ne, mika atin tang tetagan, at e ta dumine king arapan na king keang paniatang.

Santiago 5:8

Mibata kayu naman: patibayan yula ding kekong pusu: uling ing paniatang ning Guinu malapit na.

Lucas 12:40

Ikayu man pin magsadia kayu: uli ning king oras a e yu isipan ing Anak ning tau datang ya.

KAILANGAN KANG MIKATMUAN KING ESPIRITU NING DIOS

Mibalik kayu king kakung pamamawal: Oini, itugtug ke ing kakung espirtu kekayu; ipakilala ko kekayu ding kakung amanu. —Kasebian 1:23

Dapat 2:38b

Sumisi kayu, at pabinyag kayu balang metung kekayu king laguiu nang Jesucristo king kapatawaran ning kasalanan yu; at tanggapan yu ing kalam ning Espiritu Santo.

At e ko pailasing king alak, a kaniti ating kaguluan, nung e magpakatmu ko king Espiritu; ... Babie pasalamat kapilan man king keganaganang bague

king laguiu na ning Guinu táng Jesucristo king Dios a ya ing Ipa; pasakup yu ing sarili yu king metung at metung king takut kang Cristo. —Efeso 5:18-21

Filipos 2:13

Uling ing Dios ya ing darapat kekayu bang magnasa at dapat, dikil king keang minamayap.

E yu balu king pisamban nako ning Dios, at king ing Espiritu ning Dios, manuknangan ya kekayo? Uling mesali kayu king metung a alaga; paligayan ye pin ing Dios king kekong kawatan. —1 Corinto 3:16; 6:20

Text copyright by Philippine Bible Society—used by permission.

Published in numerous languages as God supplies funds in answer to prayer. If you would like more copies for prayerful distribution, write in English. Specify which language(s) you need and how many booklets.

World Missionary Press, PO Box 120, New Paris, IN 46553-0120 USA

Libre – E Pisasali

www.wmpress.org

3-17



Read booklets online or by App
www.wmp-readonline.org

1512 Pampango HKG